

安雅堂詩集
蓮洋詩鈔

中華書局印行

安雅堂詩序

荔裳先生之泣吾越也未及數月而雷動風行百廢具舉予觀先生之治大都批卻導款而一本乎斯民之性情及閭俗之暇出一篇以相示曰安雅堂詩予受而讀之而知先生之詩則又批卻導款而一本乎先生之性情者也詩之道難矣哉旬煨月煉句敲字推其不以三百篇爲岷山之一簣求其滴滴歸原者蓋亦鮮矣自夫漢魏齊梁初盛中晚之聲影盤于於學者之臂次分別太明既舍下而趨上亦屈己以殉人譬諸東家之效西子縱盡得彼之影像而已失己之生動況其所爲效之者不取之於意態神格而區區從事於粉香脂澤云乎哉先生外不見人內不見己性情之發如是而出如是而止所謂滴滴歸原者耳憶先生與予同對

大廷時大鴻臚欲以體貌相加予浙及山左數人奮起交爭稍不爲屈成禮而退先生與焉時先生方終軍英妙之年相其意氣已具安天下之略顧予識先生之意氣於二十年之前今始識先生之性情於二十年之後予之知先生者已晚乃其安天下之略試之吾越而吾越效予且身受其福予之知先生者又甚真也自先生治越登之至安而歸於大雅然則安雅二字先生以之顏堂者予一以論先生之治一以論先生之詩

順治庚子初冬日治年弟蕭山來集之拜手題

序

客有屬予序宋子詩者予曰予不可以序宋子也荔裳年弱冠詩賦動海內洎爲進士在郎署古文詞隨手傾出學者捧爲虬珠拱璧予時驚下騎款段馬隨衆出入館舍謔浪嬉戲受其書不能成讀己丑乞假歸先君從行篋中得之慨然歎曰今日詩宗乃在萊陽汝輩真愧死矣予時愧之然猶不肯讀書距今年開表繡詠紺珠寶母空青一色其言備四氣協三靈所爲和平之音猗那清廟之奏撞華魚錦安行庠序至其幽悲困蹙落莫之言則又如戛夜琴按霜刃情詞淒緊溢水滿山其心思可以釣淵弋雲握微連吳真詞路之入門五花也予年四十齒搖髮白今始卒讀年來朝夕靡辦無過條攀宋元枝綴中晚固不能步宋子之末塵欲一言時似不可得也夫人敘次文章如吏部放官必其品地高過作者不則肩背相望始可握管作讚誦之事予望宋子尚在天上何以序爲客曰此宋志也荔裳每語子詩雕琢極意饒有郊草附庸之目今日詩宗果在萊陽而其謂子乃不去口何詎不可握管作誦乎予曰信如子言益不可以爲序也夫三唐異製分河飲水子既不能窺宋子之堂與顧自以詩導性情隨人好尚故乃辭蛾眉効鑿齒卸進賢敦塾角以我視宋子常覺心慙悅目肝貽惘然不敢自以爲詩又何以序爲客曰荔裳雖早貴中遭變故挈家浮頓吳越之閒幾致餓口及爲戶曹郎坐蜚語騎危踵險頌繫踰歲乃開花苑關藻林取千餘年之騷人墨士而衡鑲之其識日益廣學日益瞻其詩沉鬱澹雅日益變化天其或者磨煉其志氣而發皇其神明譬之窮陰沍塞百物斂肫陽春一至若華頓茁此宋子之所爲詩也物固不能兩全宋子擅文章之譽而其缺陷乃在人事子從年少即已優悠仕路所得于天者多矣何復觀其少者予曰春華競芳然不能歸斷梗龍蛇起陸然不能植朽蛻夫予亦天地間之欠人也童時喪母中歲喪父終膺惡疾貧窮愁苦千楚百沸卒未能奮然一肆力于筆墨之場得與世之文士相頡頏天雖欲砥礪我亦終自棄也矣客曰宋子既已許子子之所爲讚誦宋子亦已至矣請錄以爲序予仍貽書宋子曰予不敢以序子也

安雅堂詩集 序

順治庚子仲冬同門弟金壇蔣超拜撰

安雅堂詩目錄

五言古二十四首

七言古十七首

五言律九十首

七言律九十首

五言排律十三首

七言排律一首

七言絕三十三首

六言絕二十一首

年家子丁克振

任韓燦

丁夢芝較正

安雅堂詩

萊陽宋 琬玉叔著

五言古

上元公夫子

矯矯徂依柏蒂蒂龍門桐靈鳳棲丹霞綵翻飛囀囀吾師海嶽姿作賦凌崕峴
彈琴面少室雙鳥臨河嵩到今漆蔡間棠葉紛蒙茸聖朝應期運雷雨從飛龍
詔拜青瑣闥一鶚橫高空袖中諫獵書愆勿回宸聰東華退食暇幃幕開扶
風參差蒼長遼四座陳笙鏞美材盡吳越燕趙兼梁雍賤子牀下拜自哂同蕭
蓬愧匪鄭高密庶令吾道東時維孟夏月令旦薄天中師年甫愈艾膚澤如丹
紅雲衣燦冰雪手策青芙蓉欲獻九如篇蹇拙難爲工嘗聞滄海上貝闕羅珠
宮羽人驂虬鸞歌嘯烟波通願師享黃髮德與天魏崇策名日月上坐收鼎耳
功方將騎白鹿高揖尋韓終或充掃花使碧漢遙相從

贈宮紫玄二章

翡翠巢蘭若瓊枝棲海鶴君子秉遐思翔翔慎所託□寇撫長劍驅馬游京洛
桓謁揖公卿絳灌爲之忤太息昭王臺黃金久寂寞拂衣駕言邁去去青門郭
夏朋別路衢客子行復却燕趙異疇昔濁酒猶堪酌古來羨豪達曾不羞翟篲
縈爾青驪駒懷哉咏場藿

其二

驚風飄羽葉玄雁鳴中林豈無稻梁志浩然江海心借問客何遊言返故山岑
平生懷五嶽杖策將幽尋塞裳欲從君畏此長淮深相知在顧盼豈必投兼金
何以敘綢繆三奏朱絃琴宵征易水上勿爲霜露侵惆悵劇門客俛仰嗟陸沉
贈別張蒼伯歸里

公孫昔未遇海上牧豪豬一旦躡麻鞋射策承明廬吾友張伯子千里稱駒駘
觀書問百家作賦鄙三都及余同落葉偃蹇守菰蘆衆人尊其耳笑我爲輟駒
抗懷千載外高論追黃虞酒酣滅明燭殘雪埋戶樞感年去如波況乃憂患俱
上書來闕下各動卿大夫余方脫尉羅握手天一隅欲上昭王臺憂艸久榛蕪

感茲拂衣去不乞步兵尉投老轉惜別欲去復踟躕賤子懷更苦不敢思簞簞
故園北山北松檜交笙竿君歸幸相思好夢安可無

先大夫諱日萬壽寺禮佛因示諸生

墜葉豈更榮流波無重回哀哀古孝子痛哭嗟餅齏余少薄祜賦無凌雲才
側聞過庭訓愛惜如瓊瑰弱齡把鉛槧慈顏爲之開乾坤當百六梁木忽然摧
臂彼玄鳥難巢傾離梁災譬彼松下舛霜落成枯荻自我歌鮮民星紀凡屢該
況乃忝符節龍山崔以魏松阡渺何處莫剪蒿與萊飄蕭生素髮膝下無嬰孩
緬想夜臺內惻惻傷其懷誓言守遺教敢令官方乖庶以清白風稍酬罔極哀
宛彼鳴鳩詩俛仰誠悲哉

其二

依依簷際燕嗷嗷林間鳥經營哺其兒毛傷尾畢逋人生非空桑二人誰則無
匹庶有至性矧乃賢哲徒孝笋與甘泉感格良非誣義和無停策條忽及桑榆
榮名一不早回首空嗟吁椎牛而祭墓不及酒一盃紫綬與丹書何如菽水俱
勗哉二三子努力崇令圖及爾北堂親策名日月衢曾閱在吾黨咫尺非遙途
作歌以相警慎勿學老夫

祭沈少參岫陽

昔我先大夫掄材古豫州八紘羅鸞一顧空驂騑之子起河朔豪邁無與儔
射策居上第出宰臨東牟孤城兵火後父老嗟蜉蝣單車甫及境敷政何優柔
管絃遍衢巷多士歌薪燠翩翩遊冶兒買犢歸田疇甘雨赴期至黍稷皆盈篝
明堂計循吏續冠東諸侯到今朱邑祠歌哭未暫休維時我阿卿初服返海陬
家有小丘黎園林頗清幽公餘屏駒馭杖屨相追游臥觀溪月上醉聽松風嘯
曰余方弱冠上書不見收感君恆倒屣匪從世法求憶君西歸日校血別道周
詎知纏百六小邑遭戈矛殺戮盡兒輩白骨高于丘先人痛已矣微軀亦幸留
乾坤竟鼎沸四海合虔劉開闢萬餘里鴻雁無飛郵聞君剖符竹千騎青海頭
何圖遭讒口貝錦誰爲謀鳳凰鐵羽翮燕雀徒鳴喉抵役赴離首漸近問所由
痛哭呼宮蒼血淚零雙眸相視各老醜問我有子否昔別猶未鬢鬢髮忽如驚

握手更攜酒沉醉咸陽樓言將歸王屋終老營菟裘結廬百泉上貧簪千畝稠
藏書一萬卷足可恣冥搜況多稭稻田四時饒新菑汝如厭簪組偕我盟鸞鷟
君懷敬通憤兼抱西河憂還家席未煖沉疴遂無瘳凶計至成紀驚恒肝腸抽
龍水本鳴咽悲風益颺颺巨卿頻入夢素車漸滯道故交日零落俛仰嗟浮漚
矧余際家難鸞鵠陷離仇昔君鳴琴日顧我長悲愁充耳豈回聽覆轍將奚尤
緬想九原內聞之亦啾啾茲當發東圻掛劍臨松楸瀟湘酒中尙在清樽絕獻酬
吁嗟子敬琴絃亡真可捨令子雙環玕樂棘過王夏墨莊餘素業所未憂終憂
哭罷顧王程欲去仍停轡回首蘇門道淚盡衡漳流

大雪自卦臺宿張秀才家

看山不厭遲暝色一何速雪花埋馬蹄迺就田家宿秦風無索綯白板新泥屋
主人貧且閒鮮種滿園竹答云遠塵市新曆未曾讀昨因寒先農豚肩會宗族
幸有濁醪存使君盡一斛夜聲靜鷄犬朝光見麋鹿告歸且復留公府下尺牘
何日謝簪纓還山買黃犢

丁酉季春赴任北平留別秦州守姜繼海

余以甲午春謬領龍頭節維時值天災厚地忽而裂可憐半秦民骨肉斃陶穴
板屋盡丘墟堅城無遺堞余也對殘黎呼天眼流血雖懷蒼生憂內顧漸薄劣
安得命世才同心拯危陞姜侯中州來熊車甫安轍下令減征徭秦人大歡悅
共發囊中金審端視圭臬舂鍤手自操經營及瑣屑庶民盡子來鼙鼓弗可輟
麗譙乃聳飛高墉屹如鐵豺狼竟屏跡鴻雁有安宅憲府錄微勳馳書奏 朝
列小臣蒙大寶蟠螭出 御闈問誰爲佐理感君相提挈匡襄其不逮彌縫其
欠缺茲當赴北平置酒未忍別古人有良規過剛則虞折君有百鍊金素絲果
清絕濟之以季蛇發言捫其舌剛柔寬猛間斟酌貴明晰況復嘉陵役閭閻膏
云竭努力策脩塗留心此倪畫大用佇可期比隆干稷契扶淚強登車回首心
慳慳

寄蕭舍之

昔事大司農并轡游京洛長歡顧儔侶心期共然諾□□余多愁滑稽君善諠

歡讌夜忘歸醒醒傾壑落一麾先後出音書兩寂寥烟波萬餘里肝膽向誰暴
感物迹已陳懷人事如昨夢寐見顏色然疑醒時作矧余年齒衰剖符隣絕漠
揚舟在中流汎汎安所託之子乘遐義道遠情不薄南方有奇樹相思結紅萼
封題寄塞垣清規代良藥

蜥蜴行

退食苦炎熱披襟聊散快青蠅何營營室小厭充溢智勇兩無施未可張羅罟
承塵多蜥蜴三五相儔匹見蠅忽如怒奮迅搖其乙須臾翻靜嘿臨敵轉恐慄
將還復飲身欲動或屈膝攻取勢多端精神迥專一青蠅一何愚忘情似親暱
呼吸飽唇吻百試不一失未即盡驅除去我心所嫉吁嗟此小蟲暗合兵家術
始焉警在機終也刃出轉叶古來師老馬戰勝未敢必衰至則寡謀禍機戒不
密可憐智伯頭竟爲仇人漆

夏雨初晴同路紀望太守王心任郡丞劉聲玉司李李公治令君泛舟虎

頭石作

出郭病良已物色新霽後旭日露平曠輕烟冒遠岫柳岸雜鶯啼麥壠聞雉雊
參佐命方舟乘流望巖壑昔人挽大黃殮發拳石透遺跡樵莽間於菟昂其首
我輩際時康邊亭罷斥埃所憎簿領繁困人如介賈自公偶然暇壺觴款清晝
舉網出鱸鮓開林走鼯鼯山暝勿遽歸漁人可相就

游釣臺作

未雨山如醉既雨山如醒遙遙水雲間蒼翠無時定我攜筇竹根捫蘿踐危磴
平穿鷗鷺羣曲造鹿麋徑高峯疊層霄突兀有餘勁鳴榔潭底搖吹簫谷中應
僧房水鳥棲松際孤烟凝薄暮且投綸闌干醉復凭

謁韓昌黎祠

先生海嶽姿實踐聖賢奧介立貞元朝正氣何浩浩著論續微言傳薪在原道
微公表章力執障狂瀾倒茲邦迺迺故里廟模儼圭瑁鄉人困豺虎生齒嗟凋耗
安得奮雲旗再思鯨魚暴泰山不可躋俯仰餘深悼明經展奉遵餘生願執掃
九原風雨中英爽冀來告

宋徵書約游五峯時余有所紹之行慨念別離賦詩爲贈

宋子吾故人幼懷經世志豪舉類孔融然諾如季次筮仕古昌黎彈丸黑子地况乃半流亡斯民實憔悴君攜一僕至慨然有深唱爰與父老約盡罷無名費拔薤擊豪宗談笑誅奸吏哀鴻四野集秋禾望遺穗道路絕豺狼男女安耕織我來誠信宿憑軾聞三異五峯高矗天拄笏看蒼翠抱被臥雲岑坐觀海日出茲當發會稽啣卮話難寐恭聞古人御剛柔在執轡賢哉西門豹佩章豈無意世路日崎嶇太行未爲覺君子敬其身發言無太易何以贈余行周行祈相示回首共宿處依然白雲閣

韓子新歸中州詩以贈之

韓生何似儂雅志慕田疇結交盡豪俠座多荆蕀流盧龍遘陽九鵠巢半爲鳩猛虎礪其牙噬人如猥獮先幾貴明決盡室相與謀攀牽或徒步不辭道理脩始聞林慮好繼愛豐巖幽邑宰聞生來下榻如南州鄰里聞生來饋糧貽耕牛空同沒百載不能凡一杯金魚落人手白骨誰爲收生也具衣冠馬鬣封遺丘前年奉廣柳葬父南山頭謁余着麻屨夷然無所求郡乘久零落感懷深憂山川風俗書佐我恣窮蒐君家有釣臺樓樹與雲浮睇言二三子攜壘命輕舟垂竿發長嘯顧盼心悠悠今茲渡黃河余亦將南轉哲兄樓會稽卓爾梁鴻儔著書探宛委未肯干諸侯平安未妨寄以我當置郵行行且造廬庶幾一見不苦熱篇

纖舟不能發矧茲天氣暘河流纔至軒日中如沸湯陽鳥豈不渴祝融何陸梁兀坐地盈尺展轉轉肉傷殘書摺作枕偃息投匡牀蚊蚋率其羣以我充饌糧攬衣還復起觸目飛糗糧晶品塵尾柄爲爾徒推我倚櫺望河漢朱鳥森光芒初弦出片月筭簾來微涼魴鱖躍潛瀨鸛鵲鳴方塘安能奮羽翼一舉凌雲翔放溜仲家淺見新月喜而有作

舟行百日餘甫踐千里道客子心已瘁榜人口徒燥快哉汶泗交安流隱飛瀑今晨張我帆彌望烟波浩郵籤瞬息更前村忽而到新月破層雲稚子驚相告率爾命盤樽衣裳任顛倒銀河澹欲沒遙天碧如掃愛茲素影涼頗覺炎風好

荒蒲白鷺眠高柳昏鴉噪隔岸喚漁翁長歌竟余傲

舟中遣懷

少年慕游俠座多高陽客笑登燕市樓流連風雨夕哀歌撫長劍鷄鳴呼五白一自歎離羣飲酒不盈石

其二

夙志好詩書思與古人友雖無覆局姿奇文每在口聰明今漸衰記一或遺九努力學蠹魚悠然至皓首

其三

憶昔快登臨健可方屢鹿振衣日觀峯杖策車箱谷筋力夫何如馳驅憚平陸何當餌紫芝逍遙飼黃犢

其四

生年將半百蹉跎不自料浮沉亦何爲俛仰堪一笑古來稱豪達豈必登津要中歲有微長鱸魚庶能釣

其五

爲儒易成腐誤人惟薄宦取彼莠與苗紛糅失真贗載讀神農經悔爲尺符綰東臯田已荒歸耕未云晏

其六

嘗笑枕中書黃金散劉向道逢龐眉叟要言理無誑招我游三山飡霞飲瀝沆安期予比隣騎龍定相訪

七言古

長歌爲沈時沛孝廉生日作代

沈侯系自休文出卓犖丰姿美無匹當時作賦章華宮七澤驂騑君第一余也
瞠乎趨後塵片言相許成膠漆爾我翩翩俱少年飛揚意氣生雲烟白銅堤上
聞高咏黃鶴樓中幾醉眠誰謂陽春和者寡綵毫落紙千人傳幾年飄蕩干戈
際握手燕山論往事闕下難陳賈誼書座間時露補衡氣自是才人數每奇折
腰手板將爲吏薊門雪花大如席記君懸弧是今夕斗酒十千紛獻酬登堂盡
是江海客壯志還看劍似霜沈年坐數髯如戟沈侯盡此金巨羅我令嬋娟二
八爲君歌丈夫貴有四方志漢家邊吏功勳多駿馬貂裘行出塞君今不醉將
如何

長歌贈吳雪航先生

先生昔當草昧初首排閭閻陳良書 帝傍玉女不敢笑彼何御史能牽裾繡
衣暫輟鵲頭笏東向滄溟覽日月飛轡曾登落雁峯驅車直歷欽馬窟 今皇
敷政開明堂再條封事論否臧危詞激切絳灌怒愚忠不諒謂之狂九重詔下
秋官議羣公未解朝廷意 天子深憐唐子方當殿惜無辛慶忌同伏青蒲長
太息學士李君遭遠謫我公再拜荷優容果爾天心不可測冷署浮沉且閉關
求羊三徑相追扳韋曲鶯花載酒過瀟橋風雪賦詩還聞道新增中謁者長門
哀怨無人寫況復年來水旱頻豺虎縱橫雁滿野公也顧我涕霑襟風塵默默
違寸心五畝芙蓉湖畔宅拂衣便欲抽朝簪汲黯昔稱社稷臣臨危不肯愛其
身我公慎勿歌垂綸欲以文章報天子須使功名學古人

翁玉于年兄以蕭尺木書杜子美詩冊索題

蕭生畫手稱絕妙風格遠過文待詔曾貌天間與九歌荒唐隱怪皆殊肖三閭
大夫色憔悴山鬼乘聖善窮窶解衣盤礴余在旁舉杯向天發狂嘯翁侯酷愛
少陵詩驚人佳句常相隨手裂生綃三十幅蕭生一一丹青之浣花草堂若在
眼劍門棧道橫參差罷權歸來無長物獨攜此冊還京師長安公卿頗好事書
畫寧復論真假百鎰始購宣審杯千金贖買銅臺瓦此圖一出價必高翁侯愛

斷不肯捨卽今還謫轉蕭瑟欲歸無舟陸無馬翁侯誰令爾愛杜陵翁千
年坎壈將無同蘆花采采雁南度笠澤烟水秋濛濛君歸結廬在何處余欲攜
竿學梁鴻蕭生夙有五湖志何不招隱來江東嗚呼何不招隱來江東書君與
余持竿垂釣秋風中

送別張九如之任興化太守

離離雲際雁汎汎沙中鷗人生聚散不易料片雲浮梗常悠悠昔我逢君燕市
初放懷今古中情舒官屬司農分簿領並驅羸馬乘單車奔奔居然爾敵手逐
北君常負而走同列驚從壁上觀觥籌錯亂橫星斗余也沈身在尉羅君爲太
息長悲歌便解左驂欲相贈使我涕淚如江波作牧閩天載素琴風濤萬里蠻
烟深馮唐欲老不召見延年出守非其心故人官似黃楊厄余亦飄搖江海客
男兒鬱鬱不自得鶴栖燕壘何能擇隼旗飛飛出國門臨歧握手翻無言回首
長安舊酒徒一時歷落如驚猿五兩南征去不息鷗鳴聲裏遙相憶驛使何時
發武夷應折梅花寄顏色

題松鶴圖爲仲兄五十壽

我兄之生歲在巳長余九齡雁行二憶昔 高堂無恙時綵衣拜舞肩相次小
試爭奪赤羽旗揮毫競奪中原幟擢第猶能及老親小弟青雲偏折翅西子湖
頭開早衙烏紗皂蓋神仙吏丹筆纔搖霹靂飛朱轡未出豺狼避自從海水變
爲桑回頭萬事空茫茫我之章寧忍讀瓶傾壘恥心悲涼哀樂由來有至性
每逢初度罷杯觴況復遭時倍坎壈驂駟未騁深摧藏珊瑚釣竿且須把清泉
白石聊徜徉男兒七尺最磊落風神奕奕鬚眉蒼去年余領西州敕省兄暫返
停車賦隔家三舍報添丁握手歡呼動顏色懸弧恰值歲將除賀者盈門塗巷
塞骨肉團圓喜且驚驪駒雙駕 王程逼兄也扶病至西郊送我遙遙赴秦國
但言清白學先人更愁道遠防眠食今年嘉平之下弦我兄五十開賓筵鶴鶴
目斷猿猱澤鴻雁阻絕魚龍川隴頭梅花凍不發寒枝欲折誰爲傳懸知滿堂
奏絲管御厄西望崆峒巔愛子喃喃學爺語持鬚索哺嬌可憐豈知季父天涯
外夢魂飛越心爲牽泉蘭唐生善丘壑拂拭吳綾雅襪磚一揮散作赤城霞幾

羣鳥出青田鶴我誠此幅選明駝何以伴之銀鑿落彷彿雕梁素壁間虎奏損
吹儼酬酢羣仙出沒方壺山疊市金銀幻樓閣何須葛令贈丹砂自有安期留
大藥吾家園林非一區春來萬賴鳴笙竿余年雖壯意已衰鄉心日夜思尊驢
菱荷衣就會當去九折之坂何崎嶇百年真樂在棠棣何如攬纈歸粉榆唐生
唐生肯與俱我稅驢驢之裘爲之醅更逾五十杖而趨滯臺綰袖惟爾需畫我
東臬二老圖

送別魯壁山將軍

將軍當年擁漢節痛哭秦庭流血奇謀不用大廈危銅駝荆棘空嗚咽 今
皇仗鉞初入關詔錄先朝舊豪傑公也脫校謁承明豐沛公侯驚歎絕方略應
推耿鄧儔游談詎數蘇張舌 至尊親解御貂裘虎符繡整盤騎一舉掃清
濟漯塵棘門灞上豺狼滅秦關要害古金城推轂因爲出塞行仲升節鉞新開
府充國氏羌舊識名射鵰夜避烏蘭寨牧馬朝閒細柳營一朝拂衣解兵柄掛
冠直欲歸蓬瀛花門回紇釐面留渭童龍叟攀前旌芒屨竹杖計已就餐霞煉
藥身何輕與君相期游五嶽徘徊婚宦心榮榮君家仲連蹈海後笑擲千金如
敝荷即今三佩黃金印還鄉却乘牛車走篋裏純鉤玉轡轡宵來時作蛟龍吼
邊吏愁看龍水流故人醉折秦亭柳聞道涼州羽檄飛吐谷軍屯張掖久安得
馮唐爲上書旌旄復拜雲中守寧使山中老薛蘿須令塞上無刁斗願君驅馬
莫勿勿明月關山一回首

送別俞眉仙歸新安

古人爲吏惜折腰今人爲吏愁吹毛渭城小邑大如掌百家殺盡十家逃俞侯
年少專城居渭人始得歸田廬郭外行春策病馬壁間退食懸枯魚一朝微中
考功法拙宦違時乃承之妻兒驢背坐復跌擔囊但有琴書壓君家舊在黃山
曲武谿千轉清如玉拂衣長嘯山水間回首風塵真僕僕五柳門前菊欲黃布
帆高掛兼葭蒼歸去來今倫相憶龍雁飛時書數行

秋夜有懷胡蒼恆憲副作長歌寄之

故人昔領岷山節十日書來猶恨缺故人歸臥嵩陽岑相思千里無好音憶在

秦亭酌君酒觀面方新聞聲久百杯以後持紫髯片語相要成白首壯哉君侯
力如虎曾將綵筆題鸛鵲面縛轅門吐谷渾氏種謳歌羌女舞去秋八月蒹葭
時飛箭寄我仇池詩開卷如聞十九泉淙淙幽壑寒流漸一朝長嘯拂衣去巾
車東指咸陽路向人柴桑五柳村門臨少室三花樹邊人遮道苦死留惟我知
君此舉誠良謀攜我綾玉樽攬君白豹裘縱轡隨驀之故壘振衣數奇飛將之
荒丘古來賢豪轍轡向如此吾輩駢離之骨難封侯醉看吳鉤辭上馬北風吹
淚雪滿野臨歧握手莫相忘歸雁城邊結連社社中鷗鷺應相待漸余尙是浮
沉者君不見向子平襄糧五嶽稱逃名當年若無禽慶相周旋空山形影徒惻
惻我今何爲滯西隴一官僂蹇同雕甍繚繞終年違素心急流千丈輸君勇卜
宅將從王粲居載酒同澆劉伶冢

贈蜀中李鵬海進士

昔君射策明光宮騰驤燕市驂驅空誰遣妖星逼天關鼎湖竟墜烏號弓小臣
攀輿死未得重繭萬里還鄉國劍閣嵯峨戰血腥豺狼竊據昏巴夔入口淒涼
何所歸窮途那免寒與飢長鑣作伴拾橡栗短褐不完歌采薇清渭灘頭釣魴
鯉誅茅結屋將已矣亭邊呵止故將軍驢背誰知前進士青鞵竹笠秦川來登
高懷古義皇臺酒酣拔劍鸛鵲舞夢回巫峽秋猿哀達人自古嗟飄蕩鼓刀而
屠太公望天子宵衣問隱淪徵書旦夕磻谿上

送王西山之閩

故人昔作恆州宰解組歸來今十載牆東避世王君公短笠長竿傍滄海詎意
柴桑臥未整一官還請向閩天閩天一去萬餘里男兒心事劇可憐鄉國豺狼
兼蜥蜴豎毛獠爪相教迫折將果樹付樵青強理鬚眉甘鐔白嗟余磨折風塵
裏浮沉堪笑車生耳各有深愁言不了況復形容俱老矣君之諸孫是我甥大
兒白哲能聰明來時繞膝問其姨婦日挽鬚解送行勸爾攜家愁薄糲團團差
足忘羈旅麥稔且飽荔枝香兒童應効婢隅語聞道螺江征戰苦庚戌頻呼淚
如雨好將心計佐藩宣莫學君家短主簿

贈別趙懿侯

昔年同應賢良詔汾陽才子年最少藐姑仙人謫塵表冰雪爲姿誓窮窈窕燕山握手獨相憐歷落崎嶇頗同調狂歌擊筑酒人旁中夜登樓發長嘯出宰姑蘇有異聞吳人往往稱神君余也擎舟恰相訪載酒同醒要離墳今時強項難爲吏南箕貝錦何紛紛解組翻能遂幽討遍探禹穴發奇文十載故人消息斷忽向盧龍羅款段乍認鬚眉各自驚共說遭逢有深嘆使我新詩字字工但道窮愁無畔岸已知綰綬誤潘生更欲從戎學王粲聞道王師下夜郎銅標討日開南荒幕府誰能伸露布需君五色之筆如干將飲君塞上駝酥酒君其引滿盡一觴若逢驛使遙相憶早寄南征詩數行

釣臺圖歌贈馬蘭臺山人

九變山人聊翫世伏波將軍之苗裔家在漢陂紫閣間孤情獨與烟霞契彈筆叩缶本秦聲裂芰爲衣皆楚製儒冠誤人幾半生秋風屢雪劉蕡悵長焚筆硯事丹青潑墨吮毫稱絕藝橫轍酷似黃大癡細染還宗吳仲圭近代以來款文沈嘉隆而後作者誰山人工意不工似匠心自出無專師盧龍山水頗不惡韓家釣臺尤最奇一峯高入白雲裏登樓坐見海滄溟游人欲繪每束手譬如寫照難鬚眉一日坐我悠然堂解衣磴磴無人窺須臾圖成掛諸壁高巖遂谷光參差瀕澹旋渦漁艇立窮冥洞口烟蘿垂主人韓生有狂癖此臺自爾高曾貽見圖再拜悲且喜重之不啻商尊彝便買貞珉勒山側酌酒欲告山靈知山人此別欲何往贈汝一枝筇竹杖避世宜從鹿鹿羣結廬高臥仙人輩寧恤牀頭妻子飢要令胸中丘壑長我今持節越王城蘭渚刻溪恣偃仰預拂霜綸以待君一揮欲使羣山響記取雪深一丈時山人須鼓山陰槳

哀辭爲高二亮姬人作有序

蓋聞綽約無雙降嬋娟于帝子靈妃有耦每婉孌于風人贈珮仙姝拾翠聿來江渚散花天女乘雲偶到人間吹弄玉之簫並驂青鳳付雲英之杵交餌玄霜然而暮雨忽晴莫覓瑤姬之館綵霞一散空悲阿閼之城宜蒔士之鍾情爲佳人而掩袂望盧滋感偏傷潘岳之心易服而悲不免守荆之涕哀悼之作有自來矣孺人生於名閭幼秉異徵有文在手預占魯國

之祥遇雪能詩不忝謝家之範雲裳楚楚長眠翡翠之樓素腕盈盈舊織鴛鴦之綺游洛濱之水飄若驚鴻來陌上之桑空勞駐馬二亮先生家擅琳瑯人疑瓊樹接西京之詞賦曾題夢筆之橋訪南國之娉婷親歷浣紗之石感神巫之云吉復龜筮之咸從渡荇之溪迎來桃李重海棠之價聘以梅花鄉是溫柔豈白雲之足羨歌成宛轉恐素體之將飛纖錦殘絲散作香奩之曲畫眉餘黛助成封禪之書鏡裏雙鸞忽散劉賓之影雲端三鳥俄催閨苑之旌其始至也托靈鳳以爲媒其將歸焉以文魚而作媵杳杳蕪蕪嗟胡香之不驗珊瑚珮玉恨齊客之無徵宜其撫錦瑟而歎歎對金鈿而覆臆者矣昔者彥先贈婦陸子代以爲言奉倩傷神傳生見而深慨莫不流韻金闈遺悲形管凡以哀絕代之難逢慰良朋之沉痾不可廢也爰抽短思而作長歌其辭曰

高侯海岳文章伯前身應是仙人謫文姬滅沒已千年演作傳奇十八拍廣陵坐上牧之豪一日題遍金釵客美人如林看不足片帆訪麗苔溪曲雲母爲舟蘭作橈載得嬋娟名碧玉碧玉家在白蘋湖冰雪生來指爪殊百兩將歸須吉士十年乃字感神巫日出東南秦氏樓使君有馬空躊躇偏愛陶潛五株柳不羨石家百斛珠皎皎春華金跳脫沉沉秋月博山爐秋月春華經幾許書向鍼樓理機杼纖得鮫綃束楚腰教成鸚鵡能吳語分明記得前溪舞羅袂飄飄欲輕舉古來尤物本移人月降星流信有神聞道嫦娥曾嫁界或言洛女定爲甄絳衣使者前致辭雲旗翠罕何駢駛君是玉皇香案吏妾迺蕊珠宮裏嬪六載塵緣續續眷此別茫茫幾時見語罷離梁燕子悲泣來翠鳳搔頭顛掠髮環梳墮馬鬣彌留猶索蘋蘩薦可憐小院落歡枝碧紗無復流鶯囀黃洛山前飛暮雨行人競醉夷光墓人間何處覓桃根天上祇應依桂蠹我聞此事悽愴數息佳人葬北邙平子定情良足羨潘岳哀歌亦可傳海外招魂方士死竺乾詎有胡僧香造物由來多怪當明珠易損珊瑚泐高侯奇福爾曾消況是傾城難再得

穆賓日年兄爲其太夫人廬墓歌以美之

昔君作吏長淮北升堂拜母歡相得石澗湖頭別幾秋寄書竟乏南飛翼去年
奉母廣柳車麻衣徒步歸里閭倉皇未得走相唁炙鷄欲盡空容趨近聞馬鬣
已就封何以樹之梓與松白石而垣茅作屋晨昏上食如殯養素冠纓樂淚瀾
瀾涕痕灑處繁英死夜半空山雷電過母也無驚兒在此小人有母早相捐昔
容髣髴留梧棲生兒未得一日養萬鍾黍稷嗟徒然君不見顏烏之冢高於山
羣烏啣土血斑斑又不見東陽許孜攀枝哭猛獸聞之殺麋鹿至性由來動鬼
神寥寥者我堪再讀北平郡志遭烽燧忠孝無徵罪長吏今看墓側產芝馴白
兔我將大書特書記其事

放歌行贈馬義徵

畫花如欲語畫鳥如欲飛徐黃已往不可作近數淮南馬布衣蹇驢笠笠來燕
市五侯屏幃生光輝尤善蒼鷹及鴻雁楓林颯颯蘆花稀霜拳未下狐兔走碧
波羣啖符藻肥我從龍首來攜得一鸚鵡顧影輒哀鳴交交念儔伍君繪其一
桐花陰素壁雕籠相向舞雪衣化去委蒼苔丹青尙爾留風雨高士從來信不
羈雲林迂絕虎頭癡狂歌白眼每驚座醉臥青樓醒畫眉鸚鵡典後復何有但
言賞遍盧龍酒只今八月雁來時袖中禿筆還如帶一幅吳綃結一斗

歲己亥暢月十有三日恭值我太僕長兄六表有二初度又四日則吾嫂

張恭人設悅之吉蓋長于余兄者一焉碩人君子百年偕老閨內雍雍琴

瑟在御雖詩人所咏葛覃樛木諸什何以過之宜其和能致祥以引無疆

之年也琬繫官於外不克稱百年之觴者十三載於茲矣念具爾之無多

知還轅於何日爰命畫師繪圖為壽圖成而系之以詩俾童子誦以侑酒

神宗戊戌吾兄生是時吾父方筆耕長貧未免牛衣泣詩書口授從孺嬰解

辨之無有深喜掌中珍惜如連城小第懸弧在館舍嫂氏灼臍聞啼聲我母

初來秉家政姑婦相依以爲命曉汲寒漿夜績麻二人不復憂溫清織紵常爲

隣里師蘋蘩善體慈幃性惟布能安德耀粧劬勞獨抱桓君瓊吾父東曹曾

典選兄也出入蓬萊殿大官珍膳視羶薌上林芻蕘輸圻甸罔卿拜命佩銀黃

滿朝動色公卿羨座上常盈珠履客五侯傾倒通宵宴機槍一起沸乾坤雁行

零落今半存丹腹空餘堂構恨白楊堪泣鶴鵲原筋力年來猶矍鑠青鞵竹杖
行丘園時共山僧談浩劫每從田父開芳樽絳人甲子已雙周翠瑟雍容至白
頭闔德由來咏樛木小星無怨抱金襴錦筵開日逢長至人同宮縷共添籌宗
黨迎門致羊酒百年偕老真好逮有弟有弟在肥如側身東望空躊躇即今謬
忝金魚佩尙憶當時竹馬車官貧何物堪爲壽釣得灤江雙鯽魚嫂氏中廚辦
鹽鼓烹之燕客當何如

白鳥行

濟州城北荻葦叢蚊虻舉族巢其中子孫不知幾萬億得時栩栩乘炎風飛而
食人帝所命蒲葦奮翅聲騰騰憤入雕甍及翠帳詎分炸魃與饕餮深閨驅遣
損統扇中夜爬拂愁老翁二三游魂飽不歸獻誠或染桃笙紅庶人火攻出下
策男呻女吟宵難終漸近淮徐聞更感此物亦復修南宗吁嗟乎南山之虎尙
可縛齏爾小蟲何太惡利喙渾疑李樹州輕趨頗似秦長脚夜譙誰乾鸚鵡螺
畫眠未穩驚蒼幕趙女水肌啄作瑕楚妃玉臂甘如酪司令吾將罪祝融俾爾
遺種今爲虐安得伯益焚山林掃清窟穴無栖託君不見城關千年老紫姑人
肝作脯羣相呼何況區區肌與膚即今跳梁何地無爾曹細瑣何足誅

五言律

蟻磯

別渚王姬館危磯帝妹祠空山悲杜宇深夜舞馮夷賸岸如三峽青峯接九疑
珮環風雨降英爽逼雲旗

馮唐墓

馮公昔未遇執戟數淹留一薦雲中守能寬漢主憂古碑荒藓合高柳暮鴉秋
自笑爲郎拙蕭蕭欲白頭

宿涇陽驛聞傳慎和年兄

別酒臨江岸連鑣宿驛亭亂蜚催髮白疎雨逼燈青久客征衣黯危樓鼓角停
往來嗟旅食空負使臣星

其二

懷抱經年結村醪此夜歡明河秋不落白露月初寒官似吳江冷歌成蜀道難
塞鴻相逐發一一向桑乾

王敬哉先生招同黃卜周楊竟叟家兄答吳游摩訶菴作

贊公寂滅後不復到雲林荒徑留紅藥空堂掩素琴松陰依墻長磐響入州深
倚杖斜陽外歸遲戀鳥音

送李澹河掌科守制歸里

仙郎連畫省攬涕別青門封事留三殿遺書泣九原明星瞻嶽麓春水問河源
寄謝雲山曲歸心滿故園

其二

裴我初罷詠之子倍含淒去國鷓鴣在及關鷺正啼清樽雙闕外芳艸二陵西
爲誦加餐句殷勤戒馬蹄

送高勵昌孝廉守制

秋水青門外含淒挽素車感君孺子泣使我故人嗟荒艸迷歸騎孤帆隱暮笳
裴我那忍讀聊復誦兼葭

其二

良友悲遺線扁舟跣步回何堪鳥鳥恨重以鷓鴣哀白菟能依墓黃金欲築臺
莫愁書不達北雁又將來

長春寺上人送菜

園叟攜筐至青絲束紫莖佐予脫粟飯分爾露葵羹野客能忘酒家人不辨名
伊蒲新雨後來看月華盈

送趙眉魯之任萬年

送君薊門外飛鳥豫章城小邑仍愁稅南荒未解兵彈琴驅虎去買犢勸農耕
東帶應多暇匡廬踏月行

其二

少年依下里奇字問東隣弓冶千秋淚乾坤雙鯉鮮民鱸魚吾有夢澤雉爾能馴
潘岳初爲令風波敬此身

其三

見說予兄病兼裁令弟書平安無使到蕭索傍誰居橘柚美人思兼葭使者車
若逢彭蠡雁莫使好音疎

送姪稼菴之興安令

爾作銅章吏予慚華髮翁香隨荀令綬馬羨鮑家驄井邑干戈後家園涕淚中
先人俱出牧清白是良弓

其二

仲容才本健叔夜少而孤莫惜折腰苦須寬葬口租九江看虎渡大澤有鴻呼
到日梅花發題詩寄老夫

白仲調太夫人壽詩

蚤歲歌黃鵠諸郎羨紫駟貴花迷甲子鶴髮閱春秋笛奏雙成曲笙吹十二樓
徵音齊范母彤管至今留

其二

貝葉金仙偈蓮臺繡佛前斷葱明大義服桂引長年縣圃瓊爲樹方壺海作田
登堂慚束皙欲補白華篇

月夜張華平趙次公張蒼伯小集蘋園

平生多所負不獨爲青山明月一樽酒主人千里還孤琴鴻雁外殘雪辭蘿閣
歲晏真蕭瑟因君且閉關

甲午春日道出頓丘先大夫舊游地也拜瞻祠宇涕泗泫然感而賦詩得
十首

初入境

勝地嚴君幸猶聞五稜歌種花今尙滿攬轡此重過遺老悲堂葉孤兒感聚我
傷心烽火後流涕向山河

望城郭

昔侍鳴琴暇言從竹馬兒今來持節拜已及杖鳩時九折王尊馭千秋朱邑祠
蕭蕭松柏影風雨護南枝

拜先大夫于益詠堂

異政西門紀空堂北郭間餘恩兼夏日墮淚滿秋山伏臘羔羊獻笙歌雉子班
征衣問風鶴無奈苦追攀

謁

先師于澤宮清學宮爲
先君所建

仰止懷宣聖經營首闕宮櫺櫓春殿裏絲竹古牆中遺構靈光在宏規闕里同
煌煌三秀艸已兆桂花叢

謁先大夫于名宦祠

賈父仍名子桐鄉卽是家山川留碧血俎豆接青霞沈公鉉曾
爲頓丘令露冕懷雙鹿虞
人頌五祀漢庭循吏傳不數兩隨車

傷清先達李布宸諸君子之沒

千旄歌上國結駟舊名都君子曾貽紆先人每式廬空餘羊舌泣猶憶鯉庭趨
欲續招魂賦巫陽不可呼

清之名彥鄭羽宸杜允良李方壺輩皆先君門下士相繼而歿詩以哀之
泉比橫經日生徒爲屢盈伊人懷杜預吾道在康成負杖悲梁木脩文各玉京
鄰家吹笛切倍使旅魂驚

清有二使館皆先君鼎新

皇華使者署南北此停鑣客至渾忘暑功成不費陶堪遲博望節詎有澤門謠
四牡今來止光輝感聖朝

頓丘官署

來青曾築閣聽雪舊名軒奉母烏牌樹留賓綠玉樽高齋眠鶴子新雨長桐孫
尙想過庭日班衣爛熳門

先祠牆垣半圯于水豫章徐公豫齋脩築堅好終篇專美并以志感

遺愛歌誰嗣雙魚自豫章聲名徐孺榻碑版蓋公堂賜復蘋蘩永摘文邊豆光
九原如可作錫類誼難忘

送張康侯進士赴選

才子半爲吏如君方少年一時驚絲筆百里聽朱絃雨雪關山道音書鴻雁天
梅花春信好寄我上陵篇時大駕有
事于山陵

其二

荻莢露蒼蒼弓刀客子裝秦風餘戰駟漢使重星郎製電徠天馬彈琴下鳳凰
定蒙宣室問災異說維桑時天
地震

送東雲離孝廉

絕塞論文地清秋送客歸長天驅馬去昨夜早鴻飛藥裏還家減書郵過隴稀
承明需射策莫戀故山薇

其三

羨爾能高臥蓮華峯下居青袍雙鬢老黃葉二陵疎已著潛夫論還陳災異書
故人京洛遍問訊近何如

同歐陽介菴拜杜子美艸堂

少陵栖隱處古屋鎖莓苔峭壁星辰上驚濤風雨來人從三峽去地入七歌哀
欲作招魂賦臨流首重回

甲午初冬同趙一鶴歐陽介菴宿鷄山寺

洞壑迷青靄松杉隱白毫客來秋已盡坐久月初高天外羣峯小雲端板屋牢

明朝臨絕頂努力未辭勞

其二

鷺嶺何年關鷄巢此地傳松聲長似雨蠻氣自成煙夢散疎鍾外心清古佛前
欲從仙吏隱結宇共棲禪

其三

看山心倍勇聞磬夜何清虎傍禪牀穴人從木杪行振衣霑石色高枕納泉聲
羨爾仇池長頻來屐齒輕

寄懷胡蒼恆憲副

絕域悲行役同君賦遠游共懷五嶽志各有百年愁黃葉岷山早青天渭水流
相思倍蕭索中夜倚層樓

其二

壯志堪乘障浮名悔入關人疑龍性傲官似馬曹閒板屋青荒俗柴扉紫邏山
邊城須衛霍未許拂衣還

其三

仇池山四面百里少經過愧我勞車馬輸君踐薛蘿題詩猿鳥怪寄語水雲多
欲擬天台賦其如疎嬾何

其四

相知方恨晚相見一何疎拙宦憐同調孤城奈索居秦關砧響夜羌笛雁飛初
賴有洮河鯉遙將尺素書

其五

詩筒勞釋使招隱有新篇厭見關山月言耕涼水田黃精能駐老濁酒易忘年
余亦滄浪客歸心爲爾堅

其六

鶯君輕絃寬鈴閣鎮秋局昨日一書至伊余雙淚零愁邊秋艸合望裏暮雲停
安得聯床語更深煮荈苓

其七

一官如客子萬里隴頭分旅況蕭條見家艱涕泗豈防身豺虎窟玩世鹿麋羣
七發慚枚叟何由起使君

送別嚴方公任南安大參

建節西荒外俱爲萬里游仙人親把袂王子喜同舟飛鸞驕馬宮衣翡翠裘
論文真不厭襍被宿秦樓

其二

數息予宗袞論文七澤迴江山歸藻鏡竹箭得卿才華屋羊曇淚丹楓宋玉哀
遺孤常在念此誼古人哉

其三

璽書來隴上征旆指江關檄到龍臺宅詩留鳥鼠山嶺梅憑使寄寒柳爲君攀
佇羨樓船外壺漿遍百蠻

其四

王程過栗里洗沐試萊衣氣辨雙龍劍家傳一釣磯君王咨岳牧才子老戎機
鷄首遲遲發乘秋向北飛

贈門人張惠之

試舉西州士驂駟爾獨先家餘博物志手注養生篇倣儻龍爲友窮愁視作田
相期游太華巔頂問青蓮

寄王敬哉詹尹

不見王詹事相思隔禁林傳經家學遠求劍主恩深萬里驅車地三年避弋心
瑤華如可寄一和隴頭吟

其二

自作秦亭客邊鴻幾度飛有書常隱姓無夢不霑衣憶在碧雲寺飽看紅葉歸
此游何日再翹首向王畿

冷心芬輓詩四首 有序

順治丙申又五月朔三日驚聞吾友故川南道梅巷冷老社翁之訃社弟
宋琬具要經爲位于寢門之外而哭會有他務不暇爲文以祭爰作輓詩

四章寄於殯所之靈座焉嗟乎余與先生交未數數而氣誼相許都在世
法網繆之外感中道之棄予悼徽音之不作素車千里莫登元伯之廬哀
笛數聲空抱絳生之恨今茲偃句聊寫悲懷幕府諸君並皆石友其爲我
誦于繡帷之側廣而和之以當招魂薤露之歌可乎魂而有知庶稍慰于
夜臺也

奕奕征南幕翻翻記室才從軍詩獨老喻蜀志堪哀枝上啼鵲去梁間有鷗來
君王明月夜爲爾罷金壘

其二

獻捷巴西西日遙傳露布文鏡歌餘驚曲筆陣亞鵝羣旅觀金牛峽招魂白帝雲
羊欣裙一葉把翫倍思君

其三

應劉俱不永天意妬吾曹劍外迷丹旆軍中惜彩毫良朋哀苑式令子是枚皋
遙掬嘉陵水臨風薦一毛

其四

頗恨同心遠誰知異物歸定交非握手聞諱忽霑衣劍掛思瓊樹琴亡惜玉徽
他年華表鶴應向錦城飛

湖亭

蘭若城邊寺葉葭水際亭數椽留劫火千樹覆寒汀明月菴村笛秋風佛閣鈴
頻來真不厭徙倚暮山青

其二

移柳纔盈把栽荷不滿簷長條堪繫馬新葉恰藏鷗近拜兼官俸能添一葉丹
憑軒聊假寐且緩夢滄洲

秋夜同郭函九高虞賓王山公姜繼海觀天水石泉有作

不淺尋源興因成秉燭游入林驚宿鷺篝火聚輕燄金屑宜朝汲銀河迴夜流
歸鞍見殘月趨趨艸蟲秋

其二

萬斛明珠湧瓊屹古柳根郡名由此得遺跡至今存品水陸鴻漸探奇鄙道元
芒屨應未到何用著書繁

清水道中

龍阪高無極清秋望更賒石林千疊木板屋幾人家古驛羊酥飯空山燕麥花
停驂問舊井稅說頻加

馬跑泉

磬折秦亭路停車有勝游出逢秋雨霽坐愛石泉流髡柳迷深岸荒蒲接遠嶠
吾將勸疏鑿乘月鼓漁舟

雨後湖亭分韻二首

放衙無一事岸幘出孤城柳重低煙色荷枯碎雨聲涼雲依岫斷秋水照衣明
欲采芙蓉去高樓暮笛橫

其二

秋原新霽後藉艸愛長堤橋影眠花鴨波光浴竹鷄好峯青可數遠樹碧俱迷
問字諸生在清櫺爲我攜

其三

秦山如吏俗晴望轉悠哉把酒分青蓋行吟選綠苔波閒鷗不去風急雁將來
屐齒頻相過山僧亦見猜

徽州署中見新笋喜而賦之

南國誇冬笋貧簪此地繁充君青玉案劇向白雲根嫩可忘烹茗清應妬灌園
野人三飯飽真不羨能簪

喜周華岑見過

不見伊人久曾貽雙鯉魚足音萬里外心事十年餘俯仰驚新曆悲歡問故廬
夜闌疑夢寐頻使綠櫺虛

其二

尚憶天津口孤帆入海年啣杯看蜃市高枕對樓船多難餘生在浮名知己憐
龍頭今夜月似爲故人圓